

Mjesna zajednica Kraljeva Sutjeska

Opština Kakanj
Ulica branilaca
72240 Kakanj
Članovima Općinskog vijeća

Poštovani,

Već duže vrijeme drastično opada, ionako odavno upitan, kvalitet i perspektiva života malobrojnih stanovnika Kraljeve Sutjeske. To se ogleda kroz loše ili nikakvo snabdijevanje vodom, najave ukidanja poštanskih usluga koje su već sada svedene na minimum, nejasan status vatrogasnog doma koji je izgrađen radnim akcijama i zalaganjem građana Kraljeve Sutjeske, i niz drugih problema.

Mi, stanovnici Kraljeve Sutjeske, nismo ilegalni migranti niti slučajni prolaznici. Mi smo starosjedioci ovog povijesnog mjesta, ljudi koji u 21. stoljeću imaju osnovno egzistencijalno pravo na vodu u svojim domovima, pravo koje su imali i naši preci. Uz to, smatramo da imamo pravo barem na osnovne informacije i konzultacije u vezi s navedenim problemima, a posebno o tome šta se dešava sa snabdijevanjem vodom, te kada je i ima i to sa puno više zraka koji se također računa u potrošnju nego vode – da li je sigurna za piće.

Na zvaničnoj stranici JP Vodokom Kakanj (servisne informacije) nećete godinama naći najavu ili informaciju za Kraljevu Sutjesku o obustavi vode, radovima i sl. ali ćete zato uredno naći najave i molbe za razumijevanje kada su u pitanju naselja Rojin potok, Mala ulica, Varda, Podvarda, Doboj, naselje Hrasno, Čalukova bara, Plandište, Papratnica, Čatici, Karaulsko polje, Donji kakanj, Naselje Zgošća, a u Kakanju najave i po ulicama, zgradama itd.

Podsjećamo da je Kraljeva Sutjeska imala redovno, neograničeno i sigurno snabdijevanje vodom još prije više od jednog stoljeća, putem vodovodne mreže sa izvora Stog, izgrađene u vrijeme Austro-Ugarske. Šezdesetih godina prošlog stoljeća, radi snabdijevanja Kakanja, postavljena je nova vodovodna mreža većeg kapaciteta sa istog izvora. Kasnije je, zbog porasta broja korisnika, izgrađena dodatna mreža sa izvora Ilidža, a potom i iz rezervoara rijeke Bukovice. Nakon toga, izvor Stog više nije bio interesantan za Kakanj te je prepušten zaboravu, zapušten i neodržavan, a područje izuzetne prirodne ljepote iznad njega postalo je deponija otpada za pojedina poduzeća.

Danas, iako je broj stanovnika u Kraljevoj Sutjesci drastično opao, kapacitet snabdijevanja vodom je gotovo potpuno nestao. Ironično, općina Kakanj se danas snabdijeva vodom sa tri lokacije u Kraljevoj Sutjesci, dok sama Sutjeska nema vode.

Danas kada se postavlja pitanje nedostatka vode u budućnosti uzrokovane klimatskim promjenama dobivamo informaciju o isključenju izvora Stog iz vodovodne mreže iz kojeg se, ponovo napominjemo, Kraljeva Sutjeska snabdjeva već preko 120 godina. Kvalitet i stabilnost kapaciteta izvora Stog je neupitan i sigurni garant za upitnu budućnost vodenih resursa zato zahtijevamo ostanak isključivo na mreži izvora Stog i napominjemo da je već bilo raznih ideja i prijedloga da se taj izvor uzme pod koncesiju što ne dolazi u obzir po bilo

koju cijenu.

Naglašavamo da bi takav potez naišao na snažan otpor lokalnog stanovništva, jer nećemo i ne možemo dopustiti da se ono što je vijekovima služilo stanovništvu i što je i danas od vitalnog značaja za život u Kraljevoj Sutjesci, otuđi radi profita. Stog pripada mještanima, ne pojedincima.

Sve navedeno može se tumačiti na više načina. Kraljeva Sutjeska je kroz povijest više puta pretrpjela egzoduse stanovništva – od osmanskih osvajanja, preko pohoda Eugena Savojskog, do posljednjeg rata. Ipak, uvijek se uspijevala vratiti svom prirodnom povijesnom životu, čemu se nadamo i ovaj put – osim ukoliko ne postoje nečiji drugačiji planovi i namjere.

Zato apeliramo da se hitno pristupi izradi dokumentirane procjene potrebnih radova i ponovnom osposobljavanju snabdijevanja vodom isključivo s povijesnog izvora Stog, kao što je to bilo i u prošlosti.

Također, tražimo da se ovom povijesnom mjestu posveti pažnja kao potencijalnoj turističkoj destinaciji, sa za nas izuzetno značajnom najstarijom bosanskom džamijom, mnogo starijim franjevačkim samostanom, jednom od najstarijih bosanskih kuća specifične gradnje, te lokalitetom sjedišta bosanskih kraljeva – dokumentom državnosti Bosne i Hercegovine.

Kraljeva Sutjeska, 20. svibnja 2025. godine

Dostavljeno:
Općini Kakanj n/r načelnika
Predsjedavajućem Općinskog vijeća
Članovima općinskog vijeća



Perica Rodić
Predsjednik savjeta Mjesne zajednice g. Perica Rodić